

論報館有益於國事

梁啟超

視國之強弱。則於其通塞而已。血脈不通則病。學術不通則陋。道路不通。故秦越之視肥瘠。漠不相關。言語不通。故閩粵之與中原。邈若異域。惟國亦然。上下不通。故無宣德達情之效。而舞文之吏。因緣爲奸。內外不通。故無知己知彼之能。而守舊之儒。乃鼓其舌。中國受侮數十年。坐此焉耳。去塞求通。厥道非一。而報館其導端也。無耳目。無喉舌。是曰廢疾。今夫萬國並立。猶比鄰也。齊州以內。猶同室也。比鄰之事。而吾不知。甚乃同室所爲。不相聞問。則有耳目而無耳目。上有所措置。不能喻之民。下有所苦思。不能告之君。則有喉舌而無喉舌。其有助耳目喉舌之用。而起天下之廢疾者。則報館之爲也。

報館於古有徵乎。古者太師陳詩以觀民風。飢者歌其食。勞者歌其事。使乘轎軒以采訪之。鄉移於邑。邑移於國。國移於天子。猶民報也。公卿大夫。揄揚上德。論列政治。皇華命使。江漢紀勳。斯干考室。駟馬畜牧。君以之告臣。上以之告下。猶官報也。又如誦訓掌道方志。以詔觀事。掌道方應。以詔辟忌。以知地俗。外史掌四方之志。達書名於四方。譚人掌誦王志。道國之政事。以巡天下之邦國而語之。凡所以宣上德通下情者。非徒紀述。兼有職掌。故人主可坐一室而知四海。士大夫可誦三百而知國政。三代盛強。罔不由此。

西人之大報也。議院之言論紀焉。國用之會計紀焉。人數之生死紀焉。地理之險要紀焉。民業之盈絀紀焉。學會之程課紀焉。物產之品目紀焉。鄰國之舉動紀焉。兵力之增減紀焉。律法之改變紀焉。格致之新理紀焉。器藝之新製紀焉。其分報也。言政務者。可閱官報。言地理者。可閱地理學報。言兵學者。可閱水陸軍報。言農務者。可閱農學報。言商政者。可閱商會報。言醫學者。可閱醫報。言工務者。可閱工程報。言格致者。可閱各種天算聲光化電專門名家之報。有一學即有一報。其某學得一新義。即某報多一新聞。體繁者證以圖。事蹟者列爲表。朝登一紙。夕布萬邦。是故任事者無閤隔蒙昧之憂。言學者得觀善濬磨之益。猶恐文義太賾。不能盡人而解。故有婦女報。有孩孺報。其出報也。或季報。或月報。或半月報。或旬報。或七日報。或五日報。或三日報。或兩日報。或每日報。或半日報。國家之保護報館。如烏鴛子。士民之嗜閱報章。如蟻附羶。閱報愈多者。其人愈智。報館愈多者。其國愈強。曰。惟通之故。

其益於國事如此。故懷才抱德之士。有昨爲主筆。而今作執政者。亦有朝罷樞府。而夕進報館者。其主張國是。每與政府通聲氣。如俄土之爭戰。德奧意之聯盟。五洲之人。莫不仰首企足以觀泰晤士之議論。文甫脫稿。電已飛馳。其重之又如此。然而英國德國日本國。或於報館有譏謗之律。有懲罰之條。則又何也。記載瑣故。采訪異聞。非齊東之野言。即秘辛之雜事。閉門而造。信口以談。無補時艱。徒傷風化。其弊一也。軍事敵情。記載不實。僅憑市虎之口。罔懲夕雞之嫌。其乃揣摩衆情。臆造詭說。海外已成劫燼。紙上猶登捷書。熒惑聽聞。貽誤大局。其弊二也。臧否人物。論列近事。毀譽憑

其恩怨。筆舌甚於刀兵。或顯頌權貴。爲曳裾之階梯。或指斥富豪。作苞苴之左券。行同無賴。義乖祥言。其弊三也。操觚發論。匪有本源。蹈襲陳言。勦根塗說。或乃才盡爲憂。敷衍塞責。討論輒聞。紀述游覽。義無足取。言之無文。其弊四也。或有譯錄稍廣。言論足觀。刪汰穢蕪。頗知體要。而借闢宗風。不出鄭志。雖有斷章取義之益。未免歌詩不類之憾。其弊五也。具此諸端。斯義遂枯。遂使海內一二自好之士。反視報館爲蜚賊。目報章爲妖言。古義不行。良法致弊。嗚呼。不其恫歎。

今設報於中國。而欲復西人之大觀。其勢則不能也。西國議院議定一事。布之於衆。令報館人入院珥筆而錄之。中國則諱莫如深。樞府舉動。真相不知。無論外人也。西國人數物產民業商冊。日有記注。展卷粲然。錄副印報。與衆共悉。中國則夫家六畜。未有專司。州縣親民。於其所轄民物產業。未由周知。無論朝廷也。西人格致製造專門之業。官立學校。士立學會。講求觀摩。新法日出。故亟登報章。先覩爲快。中國則稍講此學之人。已如鳳毛麟角。安有專精其業。神明其法。而出新製也。坐此數故。則西報之長。皆非吾之所能有也。然則報之例當如何。曰廣譯五洲近事。則閱者知全地大局。與其強盛弱亡之故。而不至夜郎自大。坐智井以議天地矣。詳錄各省新政。則閱者知新法之實有利益。及任事人之艱難經畫。與其宗旨所在。而阻撓者或希矣。博搜交涉要案。則閱者知國體不立。受人嫚辱。律法不講。爲人愚弄。可以奮厲新學。思洗前恥矣。旁載政治學藝要書。則閱者知一切實學源流門徑。與其日新月異之迹。而不至抱八股八韻考據詞章之學。枵然而自大矣。準此行之。待以歲月。風氣漸開。百廢漸舉。國體漸立。人才漸出。十年以後。而報館之規模。亦可以漸備矣。

嗟夫中國邸報興於西報未行以前。然歷數百年未一推廣。商岸肇開。踵事滋多。勸百諷一。裨補蓋寡。橫流益急。晦盲依然。喉舌不通。病及心腹。雖蠶繭之力。無取負山。而精禽之心。未忘填海。上循不非大夫之義。下附庶人市諫之條。私懷救火弗趨之慮。迫爲大聲疾呼之舉。見知其罪。悉憑當途。若聽者不亮。目爲誹言。摧萌拉蘖。其何有焉。或亦同舟共艱。念厥孤憤。提倡保護。以成區區。則顧亭林所謂天下興亡。匹夫之賤。與有責焉已耳。